

Date – 08/06/2025

Time - 18:30 -18:40Hrs

HEADLINES

- Vawiin khan a ni 3-na atan Commissioner of Railway Safety (CRS) Pu Sumeet Singhal chuan Hortoki leh Sairang inkar rel kawng him tawh leh tawh loh a endik chhunzawm.
- Prime Minister Narendra Modi kaihhruai sorkar kum 11 chhunga hmalakna hrang hrang zingah Mizoramah inkalpawhna lama ram rotling tam tak siam a ni tawh.
- Prime Minister Narendra Modi-a'n India-in hmasawwna kawng a zawh chhoh meknaah hmeichhia-ten dinhmun pawimawh tak an luah tih a sawi.
- Ram mipuite hnena thu leh hla bakah chanchin thar puang chhuaktu, Akashvani-in kum 90 a tling.

<><><>

RAILWAY

Vawiin khan a ni 3-na atan Commissioner of Railway Safety (CRS) Pu Sumeet Singhal chuan Hortoki leh Sairang inkar rel kawng him tawh leh tawh loh a endik chhunzawm.

Northeast Frontier Railway (NFR)-a Mizoram awm chiltu Deputy chief engineer (Construction) Pu Harjema Meena-a'n Akashvani Aizawl a hrilh danin Zirtawpni atang khan CRS Pu Sumil Singhal hian Hortoki leh Sairang/Sihhmui rel chawlhmun inkara rel kawng siam zawh tawh chu a him leh him loh a endik tan a. Ngawrh takin a thawhpuite nen endik hna hi an thawk chhunzawm zel a. Thawhlehi khian rel kawng him leh him loh endik hna hi zawh fel theih beisei a ni. Endik hna zawh fel a nih hnu, a him ngei e tih a fiah a, chu chu Ministry of Railways thuneitu sangte hnena thelhu a nih hunah rel hi Bairabi atanga Sairang/Sihhmui thlengin a tlan thei tawh dawn a. July thla tawp lamah hawn theih beisei a ni.

Hemi hma hian Pu Sumeet Singhal hian Bairabi leh Hortoki inkar rel kawng hi nikum July thla chawhnu lam khan a him leh him loh endik tawhin August thla khan a him tawh tih a fiahna a thehlut tawh a. Tuna a endik hi hemi kawng km 51 chuang endik hna a zawhna tur a nih thu NFR-a chief public relation officer (CPRO) Pu Kapinjal Kishore Sharma chuan a lo sawi tawh a ni.

Hetih lai hian Nilaini khan rel bungraw phur tlan chak theih zawng tur enchhin a lo ni tawh a. Hemi ni hian darkar khata km 35 leh 50 a chak a tlantir chhin a ni a. Darkar khata km 110 tlantir chhin erawh chu ti rih lovin Thawhlehi hian tlantir chhin leh tum a nih thu Pu Harjema Meena chuan a sawi a ni.

<><><>

11 YEARS OF PM MODI'S GOVT. (INFRASTRUCTURE)

Prime Minister Narendra Modi kaihhruai sorkar kum 11 chhunga hmalakna hrang hrang zingah Mizoramah pawh inkalpawhna lama ram rotling tam tak siam a ni tawh.

Mizoram chhungah National Highway kawngpui kilometre 1,000 chuang sial a ni tawh a, chu'ng zingah chuan National Highway Infrastructure Development Corporation Limited (NHIDCL)-in kilometre 620 chu an zo fel tawh a. Kum 4 kal ta chhung chauh pawh khan km 620 a thui kawng siamna atan hian NHIDCL hian cheng vaibelchhe 13,000 zet an seng a. Hei bakah hian NHIDCL-in hna an thawh chhonzawm zelna turin cheng vaibelchhe 6,400 chu tihfel a ni leh tawh a, hna hi tan thuai tura ruahman a ni. Hna lian tham leh pawimawh thawh tawh zinga langsar zualte chu Aizawl leh Tuipang inkar kawngpui leh Seling leh Champhai inkar kawngpui hi a ni a. He'ng kawngpui siamte hian thenawm ram Myanmar leh Bangladesh bakah thenawm state Assam, Tripura leh Manipur te nena inkalpawhna a tichangtlung a, zin veivakmite tana awlsamna a nih rualin insumdawn tawna kawngah pawh a thawh hlawk hle dawn a ni.

Mizoram BJP unit hruaitu zing ami, state executive member leh Aizawl district vice president ni bawk Pi K. Vanlalruati chuan Aizawl pumpelh (bypass) kawngpui pahnih - khawchhak lam leh khawthlang lama siam hna buaipui mek a nih thu a sawi a. Aizawl pumpelh atana khawchhak lama km 34 leh metre 500 kawngpui siam hna hi Bharatmala Pariyojana ruahmanna hnuaiah cheng vaibelchhe 2,300 ruahmanin NHIDCL in an thawk tan mek a, he kawngpui-ah hian lei verh km 2 leh a chanve zeta thui a awm dawn a ni a ti a. Khawthlang lama Aizawl pumpelh km 45 a thui kawngpui siam hna hi PM-DevINE hnuaiah cheng vaibelchhe 500 sengin Mizoram PWD-in an thawk a ni. He'ng kawngpui pahnihte hi kum 2028 khian mipui hman tangkai tura zawh fel hman tum a nih thu Pi K. Vanlalruati chuan a sawi.

Kawngpui bakah hian kum 2014-a NDA sorkar a lo din hnu khan rel kawng tihchangtlun a siam belh hna hi nasa taka thawh a nih thu BJP hruaitu chuan a sawi a. Kum 2016 khan rel kawng lian chi-in a vawi khatna atan Bairabi a rawn lut ta a. Tunah hian India-in zalenna a hmuh hnu-a a vawi khatna atan Aizawl chu rel kawngin a chhun ve dawn ta ni a sawi-in Mizoram khawpui ber rel lian chi-in a thleng tur hi hmasawna ropui tak a ni a ti a. Bairabi atanga Aizawl khawpui dai mai Sairang a rel kawng siam hna thawh zawh a ni mai tur chu lawmawm a tih thu sawiin Pi K. Vanlalruati chuan Sairang thlenga rel kawng lo lut hi July thla hi chuan a taka hman tangkai a nih tur thu leh inkalpawhna lama Mizoram tana hmasawna langsar ber zing ami a nih thu a sawi a. Sairang rel chawlhmun hi Amrit Bharat ruahmanna hnuaiah changkang leh tunlai thei ang bera thuam a nih dawn thu a sawi bawk a ni.



NEP 2020

National Education Policy (NEP) 2020 chu Mizoram University-ah kalpui chho tan mek a nih avangin zir dan kalphung pawh nasa taka thlak danglam mek a ni.

NEP 2020 in a a tum ber pakhat chu thil chhui bing (research oriented) zawnga zirlaite kalpui a ni a. Kum danga an lo kalpui thin dan a bik takin theory paper chu nasa takin tihtlem a ni tawh a, chumi ai-ah chuan a taka thiltih (project work) zirlaite'n semester khatna, hnihna leh thumna-ah field work an kalpui a, dissertation hi Semester palina a thehluh turin Semester pahniha atangin an tan chho a ni. Hetiang hian hmun hran hranah thil hrang hrang zirchiangin an kal a, field work in a tum ber chu thil zir chian a nih avangin topic hrang hrang an rilru a an veite leh zirchian an chak te zirlaite hian an thlen a, chu chu zirtirtute'n lo enpuuin a tul angin an lo chulmam sak thin a. Zirlaite hian a hmunah va kalin zawhnate siamin a tul ang ang te va zirin an feh chhuak thin a, hemi avang hian class chhunga zirna pawh tihtlem vek a ni tawh. Tunah chuan Zirtawpni hi zirlaite'n field work-a an kal theih na'na dah awl a ni tawh bawk.

NEP 2020 hian tute emaw ziahsa vawn mai ni lovin, zirlaite irawm chhuak, anmahni ngeiin an va zir chhuah an mahni ngeiin an ziah chhuah leh anmahni theihna leh thiamna pholan chu a tum ber a ni a. A lehlamah chuan an lo kalpui thin theory paper tam tak paih a lo ngai ta a, a bik takin Mizo subject zirlai te, UPSC leh competitive exam dang dang bei turte tan chuan theory paper, competitive exam syllabus based a an lo buatsaih tam tak paihthen anih tak avang in. Hei hi competitive exam hmachhawn tur te tan tuna kalpui dan hi a tha ber em aw tih te naihtuahnaah an neih thin fo thin thu Mizoram University a Political Science department a Assistant Professor Pu J.C. Zomuanthanga chuan a sawi. Zirna ina inziahlul chungchangah NEP 2020 hian danglamna a thlen lo nia hriat a ni a, zirlai hi an pung tual tual niin Pu JC Zomuanthanga chuan a sawi a. Common University Entrance Test hman a nih hnuah India ram hmun hrang hrang atangin leh foreign lam atang pawhin Mizoram University an rawn thlen theih phah a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modi-a’n India-in hmasawwna kawng a zawh chhoh meknaah hmeichhia-ten dinhmun pawimawh tak an luah tih sawiin kum 11 kalta chhunga s hmeichhia-te kaihhruai hmasawwna kawng hrang hranga sorkar hmalaknate a tarlang a, science, education, sports, StartUps leh armed forces-te tiamin hmeichhia-ten kawng tinah hma an sawn nasa hle a ni, a ti.

Social media-ah he thu hi tarlangin Prime Minister chuan thil dang bakah Swachh Bharat Abhiyan leh Jan Dhan Yojana kaltlangin hmeichhiate dinhmun nasa taka thuam chak a ni, a ti a, Ujjwala Yojana hmanga in tam takin meikhu awm tawh lohna choka an nei ta chu thil chhinchhiah tlak tak a ni, a ti.

Heng bakah hian Mudra loan hmangin hmeichhe nuai tam takin eizawwna ngel nghet zawk an neih phah theih bakah an tuina leh chak zawng tihlawhtling turin ke an pen theih phah tih pawh tarlangin PM Awas Yojana hnuaia chenna in, hmeichhe hminga dah theih a ni chu hmeichhiate dinhmun sawh nghettu leh tichaktu a ni, a ti baw.

<><><>

AKASHVANI TURNS 90

Akashvani-in vawiin khan kum 90 a tling a, kum 1936 June ni 8 khan Indian State Broadcasting Service tia sawi thin chu All India Radio (AIR) tia thlak a ni.

Akashvani Corr sawi danin June ni 7, 1936-ah kha tih laia All India Radio chanchinbu, The Indian Listener chuan a pheh hmasa berah AIR chu khawvel hriat turin a tarlang a, Akashvani Delhi Station chu thu leh hla puanchhuahna a lo ni chho ta a ni.

Ramin zalenna a hmuh hnuah AIR chu chak taka thang chhovin kum 1956-ah Akashvani tia sawi a ni a, vawiinah chuan Akashvani station 591 awmin ram khua leh tui zaa 98-te hnenah tawng chi hrang 23 hmangin thu leh hla puanchhuah thin a ni a, News Services Division (NSD) chuan tawng chi hrang hranga darkar 24 chhung, chanchinthar puang chhuak thei turin hma a lak mek baw a ni.

<><><>